



Budiman (kanan) bersama-sama Abu Samah (dua, kanan) dan pesawah lain menunjukkan keadaan tanaman padi mereka yang rosak akibat dinaiki air sejak tiga minggu lalu.

SABAK BERNAM – Kira-kira 132 ekar sawah padi di Kampung Tali Air 9 Ban 2 Pasir Panjang musnah ditenggelami air sejak tiga minggu lalu akibat kegagalan kunci air berfungsi bagi mengawal paras kemasukan air ke kawasan sawah berkenaan.

Seorang pesawah, Abu Samah Mubarak, 64, berkata, masalah kunci air pembuang terlalu tinggi di kawasan itu mengakibatkan aliran air dari sawah padi tidak dapat disalurkan ke parit pembuang.

Menurutnya, keadaan itu menyebabkan air sawah kawasan itu tersekat dan tidak dapat dialirkan ke parit pembuang dengan lebih sempurna hingga menyebabkan pesawah terpaksa menanggung kerugian ribuan ringgit.

“Saya ada tiga ekar sawah tapi semuanya terjejas teruk apabila anak padi berusia sebulan jadi kering akibat sawah dinaiki air.

“Pertumbuhan anak padi terencat akibat terlalu lama terendam di dalam air sehingga menyebabkan semuanya rosak,” katanya.

Abu Samah berkata, padi yang ditanamnya itu dijangka dituai pada November depan, namun menjangkakan hasil pengeluarannya jauh merosot berbanding anggaran yang mampu diperoleh antara enam sehingga 10 tan matriks jika keadaan sawah lebih baik.

“Dua kali padi ditanam, tapi air masih tak surut-surut. Jika ini berterusan, pendapatan pesawah macam saya akan terjejas teruk dan perlu perhatian daripada pihak berwajib memandangkan masalah ini berlaku lebih 10 tahun lalu,” katanya.

Selain itu, katanya, Jabatan Pengairan dan Saliran (JPS) yang bertanggungjawab memastikan kelancaran air parit masuk dan buang ke sawah juga diharap dapat menyelenggarakan parit itu ekoran terdapat banyak rumput dan sampah-sarap.

“Kita minta supaya kerja penyelenggaraan dijalankan untuk memastikan masalah seperti ini tak berulang. Langkah terbaik, dalamkan lagi parit pembuang sedia ada bagi membolehkan air dari sawah dibuang ke laut dengan lebih cepat,” katanya.

Sementara itu, Adun Sungai Panjang, Budiman Mohd Zohdi yang membuat tinjauan ke kawasan itu berkata, pihak berwajib digesa supaya memantau semula kunci-kunci air yang berada di kawasan kampung.

“Saya lihat, masalah ini berpunca dari kerja pendalaman parit pembersihan yang sebelum ini tidak di selenggara dengan sempurna. Mungkin juga keadaan kunci air yang telah dibina ini terlalu lama, tidak lagi sesuai dengan keadaan fizikal setempat pada hari ini, kita tak mahu masalah ini akhirnya merugikan petani,” katanya.